

**REZOLUCIJA  
O JAVNOM INTERESU ZA FUNKCIONISANJE JAVNOG  
RADIOTELEVIZIJSKOG SERVISA BOSNE I  
HERCEGOVINE - BHRT**

**Polazeći** da je javni interes svih građana Bosne i Hercegovine da javni servisi ispunjavaju svoj osnovni zadatak javnih radiotelevizijskih servisa i kroz plasman raznovrsnih i vjerodostojnih informacija istinito informišu javnost o političkim, privrednim, socijalnim, zdravstvenim, kulturnim, obrazovnim, naučnim, religijskim, ekološkim, sportskim i drugim događajima, da podstiču demokratske procese, osiguraju odgovarajuću zastupljenost vijesti o aktuelnim dešavanjima, informativnim, kulturno-umjetničkim, obrazovnim, dječjim, sportskim i zabavnim programima, te da su najkvalitetniji programi dostupni javnosti u Bosni i Hercegovini;

**Zabrinuti** za funkcionisanje Javnog radiotelevizijskog servisa Bosne i Hercegovine – BHRT i ispunjavanje osnovnih zadataka javnog servisa;

**Uvažavajući** ustavne nadležnosti svih nivoa vlasti u Bosni i Hercegovini i obaveze propisane zakonima koje je Parlamentarna skupština Bosne i Hercegovine donijela u ovoj oblasti;

**Pozivajući** se na međunarodne standarde i međunarodnim dokumentima zagaranovanu slobodu govora, objektivnog, neovisnog i istinitog informisanja javnosti, te zadaću širenja društveno važnih informacija koju obavlja Javni radiotelevizijski servis Bosne i Hercegovine, ukazujemo na činjenicu da je posebna zadaća proizvoditi i distribuirati programske sadržaje koji nemaju komercijalnu, nego visoku društvenu vrijednost;

**Vođeni** interesima, potrebama i pravom građana da imaju javni servis koji će zadovoljiti njihove potrebe u skladu s osnovnom zadaćom javnog radiotelevizijskog sistema;

Parlament Federacije Bosne i Hercegovine je, na osnovu člana IV.A.4.17. Ustava Federacije Bosne i Hercegovine („Službene novine Federacije BiH“, br.: 1/94, 13/97, 16/02, 22/02, 52/02, 18/03, 63/03, 20/04, 33/04, 71/05, 72/05 i 88/08), na sjednici Predstavničkog doma održanoj 29.03.2022.godine i na sjednici Doma naroda održanoj 31.03.2022.godine, d o n i o:

## **Rezoluciju o javnom interesu za funkcionisanje Javnog radiotelevizijskog servisa Bosne i Hercegovine - BHRT**

- Pozivamo Vijeće ministara Bosne i Hercegovine i Parlamentarnu skupštinu Bosne i Hercegovine da osiguraju dosljednu primjenu Zakona o Javnom radiotelevizijskom sistemu Bosne i Hercegovine („Službeni glasnik Bosne i

Hercegovine" br. 78/05, 35/09, 32/10, 51/15 i 25/16) na teritoriji cijele države Bosne i Hercegovine.

- Pozivamo nosioce sudske vlasti da u što kraćem roku rješavaju sporove koji nastaju zbog neispunjavanja zakonskih odredbi Zakona o Javnom radiotelevizijskom sistemu Bosne i Hercegovine.
- Parlament Federacije Bosne i Hercegovine nalaže Poreskoj upravi Federacije Bosne i Hercegovine, dajući navedenoj instituciji smjernice za rad i postupanje u vezi pitanja ove Rezolucije, kako bi se osigurao neometan rad i pristup transakcijskim računima Radio-televizije Bosne i Hercegovine, jer je navedeno od javnog interesa za građane Bosne i Hercegovine, sve do završetka sudskog spora sa Radio-televizijom Republike Srpske koja prikuplja taksu u Republici Srpskoj i u Brčko Distriktu BiH, i koja od 2017. godine ne uplaćuje taksu BHRT-u u skladu sa zakonom, te sve dok Vijeće ministara Bosne i Hercegovine ne osigura dosljednu primjenu Zakona o Javnom radio-televizijskom sistemu Bosne i Hercegovine na teritoriji cijele države Bosne i Hercegovine.
- Parlament Federacije Bosne i Hercegovine poziva Ured Visokog predstavnika u Bosni i Hercegovini i međunarodnu zajednicu da ispunjavaju svoje obaveze iz Općeg okvirnog sporazuma za mir u Bosni i Hercegovini u dijelu koji se odnosi na sadržaj i ove Rezolucije, te da osiguraju programe podrške razvoja Javnog radio-televizijskog servisa Bosne i Hercegovine - BHRT.
- Pozivamo zakonodavnu i izvršnu vlast entiteta Republika Srpska da provodi Zakon o Javnom radio-televizijskom sistemu Bosne i Hercegovine, te da osigura da Radio-televizija Republike Srpske ispunjava svoje obaveze prema BHRT-u u skladu sa zakonom.

**PF BIH broj: 01-02-699/22**  
**Sarajevo, 31.03.2022.godine**

**PREDSJEDAVALJUĆI**  
**DOMA NARODA**  
**PARLAMENTA FEDERACIJE BIH**

**Tomislav Martinović**

**PREDSJEDAVALJUĆI**  
**PREDSTAVNIČKOG DOMA**  
**PARLAMENTA FEDERACIJE BIH**

**Mirsad Zaimović**